



«Հաստատում եմ»

ԵՊՀ պրոռեկտոր,

Ռ. Ն. ԲԱՐՆՈՒԴԱՐՅԱՆ

ԿԱՐՏԻՔ

Վահե Սարգիսի Սարգսյանի «Վանի թագավորության պատմության հիմնահարցերը  
Կառլ Ֆրիդրիխ Լեման-Հաուպտի աշխատություններում (Ք. ա. XIII – VI դդ.)» Է.00.05 -  
«Պատմագրություն, աղբյուրագիտություն» մասնագիտությամբ պատմական  
գիտությունների թեկնածուի գիտական աստիճանի հայցման ատենախոսության մասին

Հաստատված է ԵՊՀ Հայոց պատմության ամբիոնի 2026 թ. փետրվարի 9 - ի  
նիստում (արձանագրություն թիվ 8 ) նիստին մասնակցում էին Է. Գ. Մինասյանը, Շ. Ժ.  
Հովհաննիսյանը, Ա. Ն. Հայրունին, Ա. Ա. Ներսիսյանը, Հ. Բ. Գրիգորյանը, Կ. Ա.  
Եղիազարյանը, Տ. Հ. Ղանալանյանը, Վ. Ա. Հակոբյանը, Տ. Կ. Գևորգյանը և ուրիշներ:

Կառլ Ֆրիդրիխ Լեման-Հաուպտը եվրոպական հայագիտության ականավոր  
ներկայացուցիչներից մեկն է, որն արժեքավոր ուսումնասիրություններ է կատարել  
Հայոց պատմության տարբեր ժամանակաշրջանների վերաբերյալ: Հատկապես մեծ  
կարևորություն են ներկայացնում ուրարտագիտության բնագավառի տարաբնույթ  
աշխատությունները՝ սեպագիր արձանագրությունների հրապարակում, հնավայրերի  
նկարագրություն, կրոնի, մշակույթի, շինարարական արվեստի, տնտեսության,  
քաղաքական կյանքի հետազոտություններ: Շատ հարցերում Լեման-Հաուպտի  
տեսակետներն ուղենշային են եղել ավելի ուշ շրջանի պատմաբանների համար, ուստի  
նրա պատմագրական ժառանգության ուսումնասիրությունն ու արժևորումը կարևոր և  
արդիական խնդիր է նաև մեր օրերում: Վահե Սարգսյանի ատենախոսությունը Լեման-  
Հաուպտի ուրարտագիտական աշխատանքների համակարգված և ամբողջական  
ուսումնասիրությունն է:

Ատենախոսությունը բաղկացած է Ներածությունից, երեք գլխից, Եզրակացություններից, Օգտագործված աղբյուրների ու գրականության ցանկից և հապավումների ցուցակից՝ ընդամենը 176 էջ:

Ներածությունում ներկայացված է թեմայի արդիականությունը: Այստեղ ատենախոսը թվարկում և գնահատում է Լեման-Հաուպտի կարևորագույն աշխատությունները՝ ընդգծելով, որ այդ աշխատություններն ունեն նաև որոշակի աղբյուրագիտական արժեք: Նշվում է, որ ժամանակագրական առումով ատենախոսությունն ընդգրկում է Ք. ա. XIII – VI դդ. ժամանակահատվածը, ինչի համար հիմք է հանդիսացել Ուրուատրի և Ուրարտու անվանումների հիշատակությունը սկզբնաղբյուրներում:

Հեղինակն իր առջև խնդիր է դրել ներկայացնել Վանի թագավորության պատմության փուլերը (ներառյալ թեմայի համար կարևոր նշանակություն ունեցող նախորդ և հաջորդ ժամանակաշրջանները)՝ ըստ Լեման Հաուպտի աշխատությունների:

Առաջին գլուխը կրում է «Ասորեստանի արշավանքները Հայկական լեռնաշխարհ Ք. ա. XIII – IX դդ.: Կենտրոնացված պետականության ձևավորումը» վերնագիրը և բաղկացած է երեք ենթագլխից, որոնցից առաջինը՝ «Ուրուատրի-Ուրարտու երկիրն» ըստ Կ. Ֆ. Լեման-Հաուպտի ուսումնասիրությունների» վերնագրով, նվիրված է ոչ միայն Ուրուատրիի հիշատակությանը և նրա՝ Ուրարտուի հետ նույնության հարցի քննարկմանը, այլև նույն ժամանակաշրջանում (Ք. ա. XIII – IX դդ.) ասորեստանյան արձանագրություններում հիշատակվող այլ երկրների մասին տեղեկություններին:

Առաջին գլխի երկրորդ ենթագլուխը վերնագրված է «Հայկական լեռնաշխարհի ասսուրերեն արձանագրություններն արշավանքների համապատկերում»: Այստեղ ներկայացված են Հայաստանի տարածքում Ասորեստանի արքաների թողած արձանագրությունների մասին Լեման-Հաուպտի հետազոտությունները և դրանց արձագանքը պատմագրության մեջ:

Առաջին գլխի երրորդ ենթագլուխը վերնագրված է «Վանի թագավորության կազմավորումը» և նվիրված է Արամու և Սարգուրի I արքաների մասին Լեման-Հաուպտի տեսակետների քննությանը:

Ատենախոսության երկրորդ գլուխը կրում է «Բիայնիլի-Ուրարտուի վերելքը» խորագիրը: Այստեղ երեք ենթագլուխերում հաջորդաբար քննության են առնված Իշպուինիի, Մենուայի և Արգիշտի I-ի ու Սարգուրի II-ի ժամանակաշրջանին վերաբերող խնդիրները:

Երրորդ գլուխը վերնագրված է «Վանի թագավորության թուլացումը և անկումը: Հայաստանը Ք. ա. VI դարում»: Այս գլուխն ունի երկու ենթագլուխ, որոնցից առաջինը վերնագրված է «Ուրարտուի և Ասորեստանի պայքարը Ռուսա Սարգուրորդու օրոք»: Այստեղ քննարկվում են Ասորեստանի թագավոր Սարգոն II-ի Ք. ա. 714 թ. արշավանքի մասին տեղեկություններն ու դրանց մեկնաբանությունները պատմաբանների կողմից: Երրորդ գլխի երկրորդ ենթագլուխը, որի վերնագիրն է «Ռուսա Արգիշտորդու և Ռուսա Թրիմենայորդու գահակալությունը Վանի թագավորությունում: Հայաստանը հետուրարտական շրջանում», ավելի մեծ հետաքրքրություն է ներկայացնում, քանի որ այստեղ արտացոլված են ոչ միայն Վանի թագավորության պատմության վերջին փուլին, այլև Երվանդական Հայաստանի պատմության հիմնահարցերը: Սա կարևոր է հատկապես այն տեսակետից, որ Լեման-Հաուպտն իր ժամանակի այլ հետազոտողների նման հայերին համարում էր Վանի թագավորության փլատակների վրա պետություն կառուցած ժողովուրդ, ուստի այդ տեսակետներին ծանոթանալը և դրանք վերլուծելը միշտ էլ արդիական է:

Աշխատանքի արդյունքներն ամփոփված են «Եզրակացություններ» բաժնում:

Վ. Սարգսյանի թեկնածուականատենախոսությունը կարևոր և արդիական ուսումնասիրություն է, որտեղ առաջին անգամ ամբողջական և համակարգված հետազոտության առարկա է դարձել Կառլ Ֆրիդրիխ Լեման-Հաուպտի ուրարտագիտական ժառանգությունը: Հեղինակը կատարել է մանրակրկիտ ու բարեխիղճ

աշխատանք Լեման-Հաուպտի տեսակետները ներկայացնելու և վերլուծելու ուղղությամբ: Աշխատանքում առկա են նաև որոշ թերություններ:

1. Ատենախոսության մեջ շատ քիչ տեղ է հատկացված Լեման-Հաուպտի կենսամատենագիտությանը: Կենսագրությունը ներկայացված է մեկ ծանոթագրության մեջ, իսկ աշխատանքների մի մասին համառոտ անդրադարձ է կատարվել ներածության մեջ (զարմանալիորեն այդ աշխատանքները թվարկված ու նկարագրված են «Թեմայի արդիականությունը» բաժնում): Մեկ անձի նվիրված պատմագրական հետազոտություններում ակնկալվում է մեկ ենթագլուխ նվիրել տվյալ անձի կենսագրությանը, իսկ աշխատություններն էլ ներկայացնել ամենայն մանրամասնությամբ՝ գրվելու ժամանակն ու հանգամանքները, կիրառությունը, պատմագրության վրա ունեցած ազդեցությունը և այլն:
2. Ատենախոսությունը շարադրված է ժամանակագրական սկզբունքով, ինչը տրամաբանական է, սակայն կառուցվածքում առանձնացված չեն Վանի թագավորության պատմության առանձին հարցերին (կրոն, լեզու, մշակույթ, պետական կարգ, ժողովրդագրական պատկեր և այլն) նվիրված բաժիններ: Այդ խնդիրների մասին Լեման-Հաուպտի տեսակետները և դրանց վերլուծությունը ցրված են ատենախոսության տարբեր գլուխներում: Նույնիսկ այն դեպքերում, երբ գլուխը կամ ենթագլուխը նվիրված է հայեցակարգային հարցերի, օրինակ՝ Վանի թագավորության կազմավորումը կամ անկումը, Ուրարտու-Հայաստան անցմանը, քննարկված են ոչ այնքան Լեման-Հաուպտի հայեցակարգերը, որքան մասնավոր խնդիրների (Սարգուրիի տիտղոսաշարը, Սալմանասար III-ի արշավանքի երթուղին, հնագետների գտած կարասները, Կյուրոս Մեծի պատերազմները, Աբեմենյանների տերության և Վանի թագավորության վիմագրական ավանդույթների միջև առկա զուգահեռները) մասին նրա արտահայտած կարծիքները:


3. Ատենախոսության շարադրանքն ավելի դյուրըմբռոնելի կլիներ, եթե գլուխների և ենթագլուխների վերջում հեղինակը ամփոփեր տվյալ հատվածում արված եզրակացությունները: Այդ ամփոփումները բացակայում են բոլոր ենթագլուխներում:

Նշված թերություններով հանդերձ՝ Վ. Սարգսյանի ատենախոսությունը նշանակալի աշխատանք է Լեւան-Հաուպտի ուրարտագիտական աշխատությունները հետազոտելու և գիտական հանրությանը ներկայացնելու գործում:

Որոշեցին – ԵՊՀ Հայոց պատմության ամբիոնը, ելնելով վերոհիշյալից գտնում է.


ա) Վահե Սարգիսի Սարգսյանի «Վանի թագավորության պատմության հիմնահարցերը Կառլ Ֆրիդրիխ Լեւան-Հաուպտի աշխատություններում (Ք. ա. XIII – VI դդ.)» թեկնածուական ատենախոսությունը հաջողված, որոշակի պատմագիտական արժեք ներկայացնող աշխատություն է, որը լույս է սփռում Վանի թագավորության պատմագրության որոշ առանցքային խնդիրների վրա,

բ) Ատենախոսությունը բավարարում է թեկնածուական ատենախոսություններին ներկայացվող պահանջներին, իսկ հեղինակն արժանի է Է.00.05 - «Պատմագրություն, աղբյուրագիտություն» մասնագիտությամբ պատմական գիտությունների թեկնածուի գիտական աստիճանին:

ԵՊՀ ՀԱՅՈՑ ՊԱՏՄ. ԱՄԲԻՈՆԻ ՎԱՐԻՉ, Պ.Գ.Դ., ՊՐՈՖ.՝  Է. Գ. ՄԻՆԱՍՅԱՆ

Պատմ. գիտ. դոկտոր, պրոֆ. Է. Գ. Մինասյանի ստորագրությունը հաստատում են՝

ԵՊՀ ԳԻՏԱԿԱՆ ՔԱՐՏՈՒՄ  
11.02.2026



Մ. Վ. ՀՈՎՀԱՆՆԻՍՅԱՆ